

四庫全書

集部

欽定四庫全書

集部

龍洲集卷一至五

詳校官庶吉士<sub>臣</sub>翁樹培

主事<sub>臣</sub>呂雲棟覆勘

總校官原任中允<sub>臣</sub>王燕緒

校對官中書<sub>臣</sub>汪學金

謄錄監生<sub>臣</sub>鄧培善

欽定四庫全書

集部四

龍洲集

別集類三 宋

提要

臣等謹按龍洲集十四卷宋劉過撰過字改之廬陵人當宋光宗寧宗時以詩遊謁江湖韓侂胄當國時嘗欲官之出使金國而輕率漏言卒以窮死蓋亦陳亮之流而跡弛更甚者也當其叩閤上書請光宗過宮頗得抗直

聲然其時在廷諸臣已交章論奏非廊廟不言待於草野言之者何必屋上架屋為此嘵嘵特巧於博名耳又屢陳恢復大計謂中原可不戰而取更不過附合時局大言以倖功名北伐之役後竟何如耶楊維禎弔其墓詩云讀君舊日伏闕疏喚起閑禧無限愁文人標榜之詞非篤論也其詩文亦多粗豪亢厲不甚協於雅音特以跌宕縱橫才氣望溢要

非齷齪者所及故今猶傳焉集凡十四卷後  
附宋以來諸人所題詩文二卷合十六卷岳  
珂程史記過始末頗詳稱其開禧乙丑過京  
口相與撫竒弔古多見於詩其多景樓一篇  
廣漢章以初升為之大書詞翰俱卓犖可喜  
屬為刻樓上會兵起不果云云今集中詩以  
此篇為冠蓋由於此然伏闕一疏今竟不載  
於集中其尚有佚篇歟至蔣子正山房隨筆

載其辛棄疾席上賦羊腰腎羹絕句及為張  
栻作張浚挽詩以集中不載為遺珠之憾核  
以岳珂程史蓋小說之附會非脫漏也乾隆  
四十三年三月恭校上

總纂官

臣 陸錫熊

臣 孫士毅

臣 陸費墀

臣 孫士毅

總校

官

臣 陸費墀

龍洲集原序

古人以詩名家者衆矣予兄改之晚出每有作輒伸尺  
紙以為藁筆法道縱隨為好事者所拾故無鈔集詩章  
散漫人間無從會粹澥嘗游江浙涉淮甸得詩詞表啟  
賦序於所交游中纔成帙多為同儕取去歲月久淹應  
酬幾不能給或以是而獲謗吁上而李杜韓柳近而歐  
蘇陳黃大篇巨帙爛如星日絢如綺組膏澤流於無窮  
於此何足秘哉用是鋟木以廣其傳每得名賢序跋詩

文亦多嘗陸續以刻少有舛闕不敢輕易竄易或収善  
本能一賜叅對至願昔端平紀元六月望日劉澥謹題



欽定四庫全書

龍洲集卷一

宋 劉過 撰

歌行

襄陽歌

十年著脚走四方胡不歸來兮襄陽襄陽真是用武國  
上下吳蜀天中央銅鞮坊裡今作市八邑田熟麥當糧  
一條路入秦隴去落日彷彿見太行土風沉渾士奇傑  
嗚嗚酒後歌聲發歌曰人定兮勝天半壁重開新日月

買劍傾家貲市馬託生死科舉非不好行都兮萬里人  
言邊人盡麗材卧龍高卧不肯來杜甫詩成朱希駕二  
三子亦英雄哉

多景樓醉歌

君不見七十二子從夫子儒雅強半魯國士二十八宿  
佐中興英雄多是南陽人丈夫生有四方志東欲入海  
西入秦安能齷齪守一隅白頭章句浙與閩醉遊太白  
呼峨岷奇材劍客結楚荆不隨舉子紙上學六韜不學

腐儒穿鑿注五經天長路遠何時到側身望兮涕霑巾

紅酒歌呈西京劉郎中立義

桃花為麴杏為漿酒醞仙方得心法大槽迸裂猩血流  
小槽夜雨真珠滴岷山之北古襄陽春風爛漫草花香  
乘輶誰為部使者金閨通籍尚書郎兒樣愛民真父母  
十萬人家感恩厚驚兒不酌宜城黃流霞造此江南酒  
輪蹄日日行樂同琥珀潑灑琉璃鍾珊瑚枝下貴公子  
人面日色相爭紅欄杆十二開簾幙腰鼓轟雷奏仙樂

翠翹金鳳大隄倡玉纖捧勸羅衣薄人生百歲能幾何  
海棠花開春較多有貂可解換一斗醉到天曉待作麼

瓜州歌

今年城保賽明年城瓜州寇來不能禦賊去欲自囚偉  
哉淮南鎮禹貢之揚州念昔叢爾寇馬箠輕江流翠華  
離金陵人有李郭不幸被帳下兒長戈春其喉與尸有  
遺臭鮮血粘髑髏敗軍慘無主餘衆散莫收勢當截歸  
路盡與俘馘休甲兵洗黃河境土盡白溝天子棄不取

區區乃人謀金帛輸東南禮事一何優參差女牆月深  
夜照敵樓泊船運河口頗為執事羞

盱眙行

車徐行馬後馳天寒遊子來盱眙功名邂逅未可知生  
平畢竟要何為既不起草黃金閨又不侍宴白玉墀何  
不夜投將軍飛勸上征伐鞭四陲滄海可鎮山可移男  
兒志氣當如斯安能生死困毛錐八韻作賦五字詩金  
牌郎君黃頭兒有眼不忍重見之志大才疎浩無期逢

金方四萬全言 卷一  
人舉似人笑嬉謂之癡人未必癡喚作奇士何能奇

從軍樂

芙蓉寶劍鸛鵒刀黃金絡馬花盤袍臂弓腰矢出門去  
百戰未怕皋蘭塵酒酣縱獵自足快詩成橫槩人爭豪  
但期處死得其所一死政自輕鴻毛將軍三箭定天山  
丞相五月入不毛生前封侯死廟食雲臺突兀秋山高  
書生如魚蠹書冊辛苦雕篆真徒勞兒時鼓篋走京國  
漸老一第猶未叨自嗟賦命如紙薄始信從軍古云樂

登昇元閣故基

脚力倦矣曷少休侵晨更作昇元遊眼中已不見二百  
四十尺之高樓但見炊煙萬灶宿貌貅上有啼鴉噪鵲  
如泣訴下有藤蔓老樹根據枝相虯想其結締初匠石  
巧與造物侔楠櫟枅栱不知幾大木一木牽挽回萬牛山  
川退聽左右受約束日月烏兔早暮東西流河房之旗  
矗立矮如戟臨春結綺望仙三閣俱下頭盃垓堠潛培  
塿而已矣蹄涔洞庭芥為舟拄撐霄漢彈壓大千界下

歷梁唐秦隋晉漢周一朝世故有翻覆禍結祝融回祿  
與鬱攸灰飛障天烟焰熾一火三月爛不收遂使觚稜  
化草莽丹雘成墟丘吾聞至人侈儉初何心有茆一把  
蓋頭便可留何必窮極土木事妖怪肢削赤子膏血斂  
以哀是故子劉子不仙不佛亦不侯視鸞臺鳳閣為蘧  
廬百萬買宅亦夢幻泡影漚江西豈無家白沙翠竹泉  
石幽小亭茅簷曝日搔背癢籬缺牆破手葺修如以天地  
為室廬日月行住坐卧得自由不為朱門是不為白屋



羞有時騎鯨千里遊汗漫有時蛤蜊遽食龜殼秋彼昇  
元閣者亟成而復壞腸亦不能為之斷心亦不能為之  
憂造物何足云此身自贅疣譽堯毀桀未必公是非丘  
跖兩窖蟻與螻日斜諸公急下山我有斗酒歸去來今  
相與勸酬

大雪登越州城樓

北風吹雪天盡頭蘇州未了來越州越人夜乘剡溪舟  
烏喙還念棲山不吳人載酒登虎丘窈窕萬舞雜清謳

迤邐茂苑來長洲不顧麋鹿蘇臺遊我獨忍凍城上樓  
欲擒元濟入蔡州鐵騎突出風颼颼越人驚倒吳人愁

望幸金陵

建業水大勝武昌魚有味江東雲不比渭北春天門宰  
律兩岸石壁立石頭鍾山龍虎東西分椎牛釀酒家家準  
擬犒六軍翠華不來冷落行宮門泰華不易得天下關  
中為本根懷哉金陵古帝藩千船泊兮萬馬屯西湖真  
水真山好吾君豈亦忘中原

艤舟采石

我昔南遊武昌夏口之山川赤壁弔古齊安邊又嘗北  
抵鶴唳風聲地八公山前望淝水誰令艤舟牛渚磯樓  
船蔽江憶當時周郎未戰曹瞞走謝安一笑苻堅危黃  
雲如屯夜月白箭痕刀痕滿枯骨健兒飯飽飲馬來  
意氣猶雄歌尚烈只今采石還戍兵諸將奄奄泉下入  
飯囊盛飯酒甕酒位去三衙稱好手

龍洲集卷一

欽定四庫全書

龍洲集卷二

宋 劉過 撰

七言古

題潤州多景樓

金山焦山相對起挹盡東流大江水一樓坐斷水中央  
收拾淮南數千里西風把酒間來愁木葉盡脫人間秋  
煙塵茫茫路渺渺神京不見雙淚流君不見王勃才名  
今蓋世當時未遇庸人爾琴書落魄豫章城滕王閣中

悲帝子又不見李白才思真天然時人未省為謫仙一  
朝放浪金陵去鳳凰臺上望長安我今四海行將遍東  
歷蘇杭西漢沔第一江山最上頭天下無人獨登覽樓  
高思遠愁緒多樓乎樓乎汝奈何安得李白與王勃名  
與此樓長突兀

清溪閣次胡仲芳韻

瓊樹枝新梅蕊迸與君攜手清溪閣舊來俠客歌舞場  
何似詩人風雪逕溪邊傑閣高峻增左右華屋連飛甍

依稀王謝鳴珂里彷彿秦箏雲母屏  
古來繁華各衰歇  
只有不磨惟壁月小船何處載愁來  
哀怨一聲吹笛裂

呈陳總領五首

旄頭攬槍銳衝擊殺氣隆隆半天黑  
千家悲哀萬家哭  
唐鄧征魂招不得北斗移杓向西指  
八月風高塞塵起  
大軍忠義赴襄陽飛鳥潛魚未知死  
黔黎殷憂痛無策  
願得空中降黃白嗚呼何代無奇才  
世間未有黃金臺

其二

太宗造唐剋隋亂仁義結民過炎漢碧眼胡兒逆天紀  
忠義回天四方起嗟哉主將失紀律百萬秦人半為鬼  
浮雲改變異今古不謂前車眼中睹當時潼關說哥舒  
今日襄陽說皇甫

其三

先生文章擅經緯戰法淵源如孔子當時蜿蜒沸溪洞  
一掃蠻風淨如水胸中氣壓萬人將億萬貔貅資餽餉  
漢家火德接天統秘計奇謀堪任相願公飛章告天子



敵疾如風走如鬼

其四

商渠馳河河可憑精衛填海海可平物情大忌不量力  
立志亦復加專精憶昨痛哭麗正門白袍黑帽如遊魂  
中書堂留草茆疏不賜誅戮光宗恩暮年志氣恥彫喪  
廣文長陽吊名將願持上方三寸鐵細剖赤心告今  
上

其五

今上聰明過堯湯師王忠純如魏王君上戮力殄仇國  
六月戈甲飛冰霜泗州已復漢正朔議飾寢廟修洛陽  
草茅螻蟻百無用山林豈復中原夢敬須洗眼俟河清  
讀公浯水中興頌

憶鄂渚

我離鄂渚已十年吳兒越女空華鮮不如上游古形勢  
四十餘萬兵籌邊中原地與荆襄近烈士烈兮猛士猛  
澤連雲夢寒打圍城接武昌曉排陣書生豈無一策奇

叩閭擊鼓天不知却思仙人白玉笛胡床醉倚南樓吹  
貂蟬堦墜兩岑寂若耶溪傍還作客空餘黃鶴舊題詩  
醉筆顛狂驚李白

寄竹隱先生孫應時時為常熟宰

蘇州酒滴如真珠公能醉之酒百壺得閒政恐不來爾  
來則倒屣相與俱江山繞樓詩句好奔走萬遍同馳驅  
大書小草各有態雷電震耀鶯花姝當其半醉尚醒在  
宛若處女未嫁夫盃行到手湖海歇翻覆雲雨來須臾

義之屈使坐北面命騷如役僕與奴角巾斜飄髻毛出  
筆墨顛倒衫袖烏回旋左右如有礙歸路不記長鬚扶  
賓儕指摘士竊笑亦有好事描為圖咸云先生鬱於用  
浮沈欲以酒自娛實非能飲姑好客不時斗酒由人須  
若予乃是真飲者糟丘日日鄉無何雖然人亦難意料  
未可目以為酒徒相逢擺畧邊幅盡胸次開豁無城郭  
飲藏窮達付之酒不以禮法自束拘情歸一真舉無偽  
滑稽玩世為通儒飲與不飲無不可醉醒醒醉同一區

癡人之前莫說夢夢中說夢真濶迂客來輒飲飲輒醉此  
其所以為竹湖不然他人豈無酒欲去此脚自懶趨計  
公之客日百數結束冠帶紛座隅欲言喉牙物如梗中  
懷腹非外示愚不如鄙性好誠實退無取議進不諛歐  
公自愛曼卿放昌黎亦喜劉义簾滿城風雨重陽近黃  
花籬落金英敷山高凜風吹客倒公樓雖小主者殊狂  
當相就取一醉有酒飲我無酒酤此即雖狂亦可喜我  
去俗子疇當呼世無人兮亦已久公不容我誰容乎

明州觀大閱

卷二

書生燈窓困毛錐說著刀劍何時持忽聞殷殷金鼓震  
驚起塊坐筋骸衰國朝訓武重秋獮列都敢不張其威  
萬家駟首遮道看我亦役逐人後隨武夫橐鞬陳整整  
虎豹拏攫旌旗麾人言吳兒盡脆弱身髮文斷勇未知  
不見拔山昔項羽何必燕趙士始奇軍容燦燦生光輝  
悲風慘淡殺氣怒對此忽作邊頭思熊羆不譁曉爭出  
萬騎馳突寒打圍紛紛血毛腥原野箭竹正墮驚鴻飛

將軍仰笑兵軍賀金帛填委深溝池十年文窮坐百拙  
感慨一賦從軍詩

嘉泰開樂日殿岩涇原郭季端邀遊鳳山自來  
美堂而上湖亭海觀梅坡石林無不歷覽最  
後登冲天樓下介亭觀騎射歌舞賦詩而歸

結束戰袍騎戰馬冠軍將軍宛如畫前呵小駐來美堂  
箭去弓鳴飛鳥下青林路轉入岩堯湖亭海觀爭為高  
誰知鳳舞龍飛外別有樓閣橫雲霄回旋左右皆遊歷

人物江山兩英特風流標致梅嶺梅磊落胸襟石林石  
側身更上天上行好風吹下笑談聲山神川后領要束  
遁走虎豹藏蛟鯨摩挲苔蘚題詩去萬鼓聲中白題舞  
衆賓捧酒壽主人將軍自是擎天柱看山看水時一來  
錢塘吳越何小哉指點中原百城在功名逼人有機會

古詩

涼生几硯窓未糊秋風射入如相呼床頭吳鉤作龍吼  
便欲乘此擣穹廬丈夫詩胆如斗大摩挲笑與歌楚些



平生柔腸作鐵堅挑盡寒燈擁襟坐撞鐘打鼓天欲明  
鴉未知曉鷄先驚夜來有雨不須問聽取窻前蕉葉聲  
老僧慣閒定較可山色朦朧半烟鎖玉簪委地怕禁持  
消息雨中彈指過前四十日得一晴遠山松檜如潑青  
癡雲冉冉自辟易半江滾滾金龍生桂花畢竟終燥薄  
強出嬋娟懶梳掠正緣久不見雲生事半功倍掃蕭索  
人言快意難得時世間樂事須生悲轉頭天地潑墨黑  
依然雨脚如絲垂山翁豈識神龍志特地霖淫阻遊意

不知金鴨香篆長  
擁鼻猶可看文戲  
重重疊疊添青蒼  
誰調濃翠逸叢篁  
草木過濕有香意  
衣籠駕褥簞籠湯  
峭岩萬丈苔斑駁  
日固甚佳雨不惡  
晴明晦冥俱可觀  
芻豢有時薦藜藿  
愛山之癡如愛詩  
或日或雨皆足奇  
君不見若把西湖比  
西子淡粧濃抹也相宜

上譙江州

丘公鎮金陵辛老治京口  
君王神武欲籌邊  
九江更使何人守  
九江太守令譙侯  
譙侯德量容九州  
詩書禮樂

晉元帥意度閒遠和而謀清尊對客溫如玉同上庾樓  
望西北邊塵萬里氣壓之客有白頭何碌碌出門烟水  
空茫茫西為漢沔南衡湘指點武昌在何許買船又謁  
吳侯去

觀三疊泉

五老峯北嵯峨顛龍泉三疊來自天只因開闢便有此  
山雲蔽護經歲年一朝何事失局鏑樵者得之人共傳  
欲往從之人憚遠險溪絕壑窮攀緣初疑霜崩湧天谷

翻若雲奔不宕宿散為風飛颺輕煙垂似銀絲貫珠玉  
隨風變態難盡名洞駭觀者心與目清寒侵袂心益爽  
清甘慰齒手屢掬我欲攬之作玉虹似開九丈錦屏風  
有若揀碧金芙蓉笑騎揮斥凌太空窮源直到天河東  
贈許從道之子祖孫

祖孫今年幾年齒兩髻紉紉垂到耳讀書要以六經先  
山雲閉護經歲年老夫之見竊不然別有一說為舉似  
方今邊裔日衰甚河朔早暮風塵起腐儒酸寒作何用

國家所欠奇偉士丈夫立身兩字盡臣子忠孝而已矣  
吾觀汝相頭面濶顏色麓厚黑而紫汝翁七十鬚髮轉  
汝又科第遲如此與君生死蠹文字土田官人村夫子  
不如左彎右挾弓肉食封侯差快耳

郭帥遺巖羹

書生窮無食肉相老不能官猶崛起一杯紫巖江西羹  
萬戶封侯猶未當主人幕下三千士談王說伯如蠶起  
日日椎鮮與擊肥厭飭腥羶飽而已此生只願吃此羹

坐看將軍勛業成，金山乞取一片山。  
要看濺濺兒拳短，窮人便是知田漢。

舟中

扁舟去時風怒惡，舟入深溪雪花落。  
我行無事有底忙，且向荻花深處著。  
隣船乞火炮，蛤蜊樽中濁醪把一卮。  
陶陶萬事不復理，凍口忍吐寒酸時。

村墅

俗子有錢村亦樂，秋田未熟歌牛角。  
三家村墅無官方，

夜半呼盧笑聲謔尋思我輩不如君平生讀書徒苦辛  
遭時喪亂未得志長策短藁無由伸不如賣劍買牛去  
也學此翁村社住只愁夜半月明時得意無人和詩句

題一犂春雨圖後

阿耘無田食破硯奉親日糴供朝飯有田正恐拙把犂  
何得受為圖畫看汝父名汝汝當知有田無田未可期  
有田不畊汝懶病無田盡田真盡餅盡田之外更盡牛  
捉捕風影何時休頭上安頭入詩軸全家不應猶食粥

龍洲集卷二



欽定四庫全書

龍洲集卷三

宋 劉過 撰

五言古

寄竹隱孫先生

竹湖人之英劇縣勇自試三年種桃李遺愛及僮稚咸  
欲父母之謂吾公之子獨有督郵嫌見謂不事事瑕疪  
催科細欲以三尺治八月羈僦樓半年縻隱市小牕天  
日晴灑落自胸次抖擻舊塵埃楮札左右置寄傲點畫

間揮染當遊戲人賢世所希嗜好人共貴車馬闌填門  
載酒日紛至大書極豪放小草亦姿媚歛藏經綸業進  
此第一義玉板抄歌詩石碑刻圖記人家錦為軸高壁  
垂至地襲藏較工拙臨寫費同異爭如老劉子落魄一  
狂士半生不讀書頗能會其意寒泉驥馬飲平陸蛟龍  
起得非久幽憤於以發奇氣政使鐘鼎疎自足名一世  
毛錐久見絕一見尚能喜酒邊袖與詩不譽亦不忌有  
肯奪之去箱篋餘故紙如持將軍誥屢博姑蘇醉

同許從道遊涵碧亭

犯暑日午來坐到日落歸松桂叢團團竹光淨暉暉乳  
竇成濯纓綠染身上衣却傾所携酒對酌老石磯幽鳥  
當歌者荐以首山薇歛藏大千界游戲塵尾揮寺門長  
安道結束駟馬肥醉鄉訪腥葷屏風肉紅圍我亭不闕  
鎖何人款柴扉掉臂樵擔行藤蘿自烟霏古所謂迂濶  
若此二子稀既非携娉婷又乏玉鞍飛不知有何好林  
泉少馬依境勝更著語鬼神暗呵譏但知咲他人不覺

自己非

湖學別蘇名叟

失學老無成寧不心自慙子卿生吾後逸俊眼未見委  
身入鑪錘顧此金百鍊有如頑鈍質豈可便磨剗看君  
說經旨不異飴水建小詩雖自放風味亦不淺我途未  
易窮本自安眠飯俯仰道德光耳目自濡染涼風忽秋  
思一夜寔紙貼平生湖海夢高興動淮河追思狂踪跡  
失處不可掩醉搥黃鶴樓一擲賭百萬只今覺衰甚四

海遊已倦所餘習氣在未了一第欠師友遺隆規古學  
當自反小夫事機械心甚山川險半生客吳越生死交  
情見誰知塵土中得君初識面何時束裝來草草衾裘  
辦密邇戀軒誠功名期歲晚

荅曹元章

并序

曹元章以謹畏喜義雅為鄉里所重縣官自  
令佐以來皆敬之疑若取友必慙莊之士乃  
如某者實自放於禮法之外元章既不以狂

棄之方且粉飾語言以媚無非議我者惜乎  
相知而未深也唐賀知章逆知開元末年之  
變託意鑑湖一曲以歸落魄四明自號狂客至  
相率李白劇談痛飲呼為謫仙由今觀之豈  
不甚怪然黃冠錦袍屣棄爵祿與夫炙手權  
門推而不去者其人品孰為賢否孔光張禹  
皆大儒平日託經自文當王氏墓木未拱之  
秋相與唯阿無骨鯁臣子氣自劉更生死天

下公論之口皆箝而不敢肆  
昂祚陸沈繫誰之罪  
吾觀天下齷齪之士  
滔滔皆是後世必有  
好予之狂者則又系之詩其詞曰

先生修廉隅日日自驚畏  
老大寄杯酒狂亦非所諱  
酸醎雖不同各自有正味  
切莫對癡人說夢其詞費

古意席上為徐子宜侍郎賦

桃李多芳妍開落如春風  
託身終自天花不百日紅  
殘月望朝日各自相西東  
為君整儀容照水不照鏡  
為君

進甘旨君自內有莖悲歌欲感君聲若君不聞金玉徒  
倍君君看若浮雲父母長嘆息謂兒好容德脂澤固不  
妍珠翠亦無色娉婷艷陽春自醜不自惜君心河漢流  
為雨不復收妾心東流水赴海終不止

懷古四首為知己魏倅元長賦兼呈王永叔宗

丞戴少望

言理不可求吾將訊蒼蒼桃李被笙歌松柏遭摧傷才  
高未為福名大或不祥煌煌太史公逸氣橫八方瑞麟



出非時卷伯終見戕晏嬰不可作鮑叔遙相望發憤著  
春秋掩奪日月光文章誠可傳毀辱庸何傷

其二

高高黃金臺燕趙爭趨風後來得荆卿恩禮盡鞠躬丈  
夫易感激況在窮厄中縞衣登素車函谷照已空呂政  
當野死燕丹無奇功俠骨化為鐵血變海水紅英憤氣  
不磨今為亘天虹

其三

天地有大經聖賢實非覺一身萬世則激厲為忠  
樸周勃真少文汲黯信無學歸然社稷臣漢脉終  
有託微臣有揚雄百拜美新作男兒無英標焉用  
讀書博

其四

嗣宗黨司馬徒爾舖其糟叔夜屹玉山落落崑崙高神  
仙之可求蓬島何迢遙湯武非聖人况識師與昭一死  
繼結纓孤竹爭清標蕩陰一杯血綵鳳無凡毛鵷鵠嗜

腐鼠竟絕終身交

雨寒寄姜堯章

一冬無此寒十日不得出閉門坐如鉤老去萬感入冶  
遊亦餘事况乃燈火畢獨憐鏡湖春一一各秀發扳條  
掇芳蕤慘悴變倉卒凡草何足云誰吊梅柳屈東城  
有佳士詞筆最華逸持此往問之雨濺袍袴濕蠻箋定  
送似來時詩意澁醉裏作蛇鵝行草倩蘓十

海棠分韻得無字

步障蜀州錦重重碧羅襦嬌多不勝春十五未嬪妹我  
欲金屋之貯以貢上都窈窕來世間穠李侍綠珠冶容  
致人疑詎知非妖狐雉扇開綠綺君王麗華俱後庭非  
無花有寵爭得無八姨淡手抹試粧不施朱不如玉環  
翠睡起姿態殊人言花傾國况乃下蔡乎

謁郭馬帥

千金買駿馬百金市蛾眉長安酒家樓揮洒驚人詩天  
子不得臣公卿氣吞之俯視兒女輩自詭男子奇誰知

金陵都五年重來茲黑貂日以敝塵埃鬚成絲故人風  
雨散知己今為誰郭侯山西英而有熊豹姿巍我西忠  
廟喬木人所思垂芳到雲仍大將奕世為兄弟各三衙  
父子步武隨萬戶侯冠軍金印何累累雖然平戎策終  
鬱未得施方今羣寇擾似覺敵運衰達靼軍其西會以  
默古斯犬牙互相錯干戈極猖獗盜賊蝟毛起斂民極  
力錐父老思漢官壺漿僖王師吾君自神武妙算出籌  
帷收攬天下才尺寸不可遺機會一日來恢復此其時

況如郭侯者禮賢正謙卑使之會雲龍列城歸指麾安  
知古中原不使同驅馳過也久淪落狂名諸公知然亦  
壯心胆志慕鞭四陸脫靴呼將軍舉扇障元規自惜世  
不賞詩酒聊自嬉霜風忽無情一夜徹吟肌高卧百尺  
樓閉門無晨炊起視匣中劍依舊先陸離有恩或可報  
一死所不辭

悲淮南

淮民窮到骨忍復捉其肌不知鐵錢禁作俑者為誰行

商斷來路清野多流離主人日邊來四牡驅以馳或云  
易之是或云收之宜幾人困往返遂逐文書移救焚卒  
無策燎火久益滋緬懷征摧初山海煮摘時雖云便公  
家亦復撓其私今者縱虎豹而使渴與飢蕭蕭蘆葦林  
日夜邊風吹悲哉淮南民持此將安之

俞太占嘗叩闕上書有名天下予甚敬之相會  
於姑蘇將歸洞庭賦詩以壯其行

人樹俱不堪歲月駒隙過老懷淚如洗欲唱誰當和洛

陽今少年繁事勞力破精神經百鍊鋒銳堅不挫逃名  
縑帷日歌席快一坐氣焰九霄虹磊落萬玉貨平生牀  
上下樓輒讓子卧諸公吮疽爾不去良可唾洞庭清風  
熟肄業情勿惰有詩寄來者工拙吾能課

九日鄂渚登高楚觀分得能字

一山如龍來起伏力不勝老夫跨其脊半空欲飛騰尚  
念同遊人一二東南朋稅駕為小留木末朱欄凭遠水  
天苦濶秋風響飢鷹城郭千萬家營壘相依憑年年重



陽節高處盡可登南樓與北榭遊覽昔所曾揮花楚觀  
上醉舞僅所能驚倒地上人白日看上昇

讀書

重尋讀書盟筆硯已荆棘只堪把鉏在趣此尚有力世  
途風波惡躬履見險側敢云賣文活一錢知不直

思故人

朋從紛如雲益覺索居甚肺腸百憂集午夜不安寢長  
恐木石心化作萋兮錦日暮懷佳人霜風悄寒凜

歸耕

途窮百無成或許營菟裘依然大槐宮蟻穴夢封侯人  
生眠飢耳物外亦贅疣科名付諸公老矣吾歸休

自嘆

羣公列屋居官貴輒昂台艷粧照珠翠寒谷噓春回書  
生窮蹇甚一笑百禍胎何時業債盡面目還本來

贈鄉人周從龍談命

廬陵儒萬人頗亦出青紫老子三不歸未省鄉里士暮

年罕交遊僅識子周子風流屬當行豈止談天爾夜從  
青樓飲一醉幾欲死

送程伯俞赴海陵蘓使君之招

紅裙簇雕筵一醉當鯨吸使君若問余為道貧徹骨

龍洲集卷三

欽定四庫全書

龍洲集卷四

宋 劉過 撰

七言律

代壽韓平原

衣鉢登庸復舊氈  
文王尚父趙平原  
自從慶歷到今日  
只說開禧初改元  
朝關東齊廣東閣  
夜看南極照南園  
九霞觴舉先旬浹  
却領千官壽帝垣

其二

際會風雲振古難十年袖手且旁觀要令鄰敵尊裴度  
必向東山起謝安一品千齡靈壽杖五公四世進賢冠  
功成裂地封侯了却起赤松盟未寒

其三

疇昔張旃過相時相人爭覩漢官儀未能剗剗燕然石  
不忍摩挲畫錦碑慷慨欲平千載恨經營已嘆十年遲  
要令閱古詩篇偉好讀征車復古詩

其四

國付平章衆正開凌煙錄盡到雲臺駕鴻充序皆桃李  
焦雁成羣及草萊強國斷無踰此策隨車未必盡真材  
更須妙幹垂綸手看取靈鼇上手來

其五

宇宙之間物物春戚疎曾不間陶鈞裔分裴皞東西眷  
誼篤嗣宗南北鄰中令諸孫雖遍識栖筠俗子老堪親  
試捐內舉拘攣迹無異平原十九人

壽建康太尉

萬里寒風一布袍特將詩句謁英豪正當武曲臨凡世  
恰值驪龍出海濤五馬盡投千歲鶴六軍爭獻萬年桃  
不因此日滄溟近一釣那能得巨鰲

慶周益公新府

潭潭新府列名卿玉帶金魚喜氣橫能廣萬間庇寒士  
定容駟馬向高閔午橋莊上江山秀獨樂園中花草榮  
才作美哉輪奐頌清臺又奏相星明

辭周益公



一曲歸歎浩浩歌世間無地不風波人從貧賤識者少  
事向艱難省處多紫塞將軍秋佩印玉堂學士夜鳴珂  
太平宰相不收拾老死山林無奈何

代上譙太尉

叮嚀天語聽傳呼叱咤雷霆壓萬夫澤國使臨殊玉節  
彤墀香近惹金爐慶逢龍躍風雲濶職有蟬聯父子俱  
援手墜淵餘事耳故人有子在泥途

謁易司諫二首

已死姦諛老舐牛非才詎可鎮西州豺狼逐去羣狐懼  
鷺鳥雖多一鶚秋天下孤寒有生意諸蕃元帥為清修  
太平更有當年事未可廉纖只麼休

其二

十載長安五往來立談無語口慵開懶看齷齪隨時士  
誰是艱難濟世才常布宣無堪將相廟堂未易賤蒿萊  
上書欲謁平章去先範門前肯自媒

上金陵章侍郎

龍虎東西兩踞盤帝教彈壓此山川風行魏蜀三分國  
浪靜江淮萬里天半壁旌旗佳麗地十州鼓角鬱蔥邊  
便當擊楫中流誓莫使鞭為祖逖先

其二

欲上雲霄虎豹關失身一落市城間經過魯肅捐時廩  
想像謝安遊處山去國夢魂愁切切感時滴淚血斑斑  
少陵却欲依嚴武妻嫂輕人未擬還

上東文昌說友知平江五首

骨秀如仙孕武夷故教手筆世宗師隸分唐漢諸家字  
句壓陳黃二子詩茂苑雨晴花發處洞庭霜重橘黃時  
塵埃俗吏那能此一段奇功自可知

其二

車馬城中早上忙子城內裡看星郎十州已茂園靡草  
一炷初凝畫戟香銅剖虎符新雨露玉持使節舊風霜  
明年櫻筍成時候不在烏臺即玉堂

其三

欲上姑蘇望虎丘小邦寧有此風流山川形勢今三輔  
人物英雄古列侯華屋鱗鱗冠蓋里畫橋曲曲管絃樓  
金陵蜀郡俱疎遠除却皇都第一州

其四

行盡淮南日日東自携隻影入吳淞人生五馬方知貴  
客老諸侯嘆未逢適意秋風寧為鱸驚心半夜忽聞鐘  
十年無計離場屋說著功名氣拂霄

其五

已辦行都欲去船箇中因得少畱連長安在望空悲日  
刺史誰知別有天鼓吹後車喧水際旌旗前騎簇花邊  
書生不願懸金印只覓揚州騎鶴錢

寄李侍郎

未照玉堂金炬蓮地官董正職尤專常經要足邦中賦  
勝筭猶煩馬上鞭黃閣少須持紫橐黑頭早已繼青氈  
方今講論肥民策不數橫流地上錢

寄湖州趙侍郎

桑柘村村烟樹濃  
新秧刺水麥梳風  
舟行苔雪雙溪上  
人在蘇杭兩郡中  
鼓角麗聲相旦暮  
旌旗小隊間青紅  
主人夙有神仙骨  
合住水晶天上宮

謁淮西帥

家住徐城未卜還  
歸心正在杳冥間  
東遊吳魏三千里  
西入成都一萬山  
解使愁腸能寸寸  
空令淚眼已斑斑  
此情不告英雄帥  
說向兒曹總是閒

謁金陵李武帥

江南無此一雄藩穩稱將軍小踞盤韜畧世傳天下少  
棣華昂峙帥臣難邊氛要使如灰滅中國先須大器安  
慘慘塵沙天欲雪北風凜凜劍芒寒

其二

搏虎屠龍兩未成蕭然華髮一書生狂蹤潦倒初無定  
老氣崢嶸自不平借馬飽遊雲夢澤歸舟小駐石頭城  
磨崖已辨中興頌洗眼西湖看北征

呈李漕



默禱神仙政隱憂天心人意已周流旱苗已槁七八月  
甘雨如期十五州風月冷吹雲夢晚水花新浸武昌秋  
異時白粳輸官處知有豐年萬斛收

其二

塵埃破帽倦騎驢一雨窮途快有餘盆盎自天傾屋瓦  
龍蛇平地起階渠冷侵絺綌覺太甚聲滿梧桐殊不疎  
口業未償書有債夜深燈火小牕虛

喜雨呈吳按察

使君人物舊烏臺  
天聽雖高力挽回  
湖水欲平江為退  
秋田未旱雨先來  
雲隨黃鶴想何許  
風滿南樓亦快哉  
涼意入秋清似畫  
月岩知有桂花開

其二

黃鶴山前雨乍過  
城南草市樂如何  
千金估客倡樓醉  
一笛牧童牛背歌  
江夏水生歸未得  
武昌魚美價無多  
棹船亦欲徜徉去  
古井而今淡不波

謁京口張守

未識諸人名已侯一麾應此滯徐州誰知安石恐未免  
欲借寇君何可留遺愛與山同北固平生作計豈東周  
上方已聽尚書履聲在星辰最上頭

其二

危樓年少記登臨老矣重來力不禁風月欲談嫌許事  
山川不險似人心淡烟衰草鄉關遠細雨黃花節序深  
雖有小詩行樂處世無知己為誰吟

上劉知州

戰外梅花角有聲使君心與日華明郡當采石今衝要  
船在烏江罷戰爭酒賤人家歌袴飲地寬客子帶刀耕  
太平官府無公事見說香凝燕寢兵

其二

草樹荒寒晚葉枯又尋短棹泛焦湖場經古戰心欲折  
世幾諸侯飢更驅去國寂寥從白眼籌邊謀畫看洪儒  
袖詩來謁公應記曾說襄陽厠座隅

雪中呈顏使君

一冬所欠者雪耳造物忽然如戲兒清甚牧之江上郡  
朗吟次仲館中詩試燈夜靜疎梅落賣劍村深小麦滋  
多少使君調燮意風流自有化工知

其二

陰陽舒慘剎那間敕使天高見一斑人物眼中如水鑑  
世情身外不冰山滌除瑕垢與掩匿彈壓風雲俱澁慳  
羔酒帳金輸武庫煮茶蕭寺等僧閒

喜雨寄徐東陽

知州昔有賢從事今作東陽父母官百里望風皆畏易  
四郊得雨及時難秋成有望米減價水滿不爭民業安  
詩句定多公事少不妨閒寫寄人看

謁江華曾百里

樞衣三十年前事曾以諸生傍絳紗一國所尊吾白下  
雙鳬猶遠令江華時來館學總餘事老去衣冠懷古家  
共恠我門郊島外狂生尚有一劉叉

其二

髣髴已皤非故吾依然破帽老騎驢江邊遊子斷腸句  
漢殿逐臣流涕書父母松楸三世塚弟兄桑梓百年居  
孤丘未死歸心切未有相如駟馬車

贈鄂渚李廣文

曾去征袍異主恩青衫君已染塵痕故人然諾千金重  
刺史文章一代尊楚澤地多增感慨峽江天小易黃昏  
要知後夜相思處細雨青燈獨掩門

贈侯戎

江淮萬里以詩行此老胸中有甲兵何止據鞍猶矍鑠  
試教落筆便縱橫逢時有用真才出知已不遭儒者輕  
若見英雄今馬帥為言劉子尚狂生

贈趙道卿

虬髯蝟鬚虎精神兩袖披披二尺巾散盡貲財猶結客  
畧交言語便驚人斬蛟橋下懲前失藏兔窟中甘後塵  
朝士只今誰著眼顛狂贏得且安身

贈陳時可



交游半世已公卿猶抱遺經對短檠負米過於扛鼎重  
選官難似上竿行百年母子相依命一片忠忱誰為明  
燈火小樓風雨夜歲寒時得話平生

呈胡季解

老病顛狂藥不醫簾豪罵坐欲何為前生縱使希真是  
已死尚存忠簡知顛倒六經鸚鵡舞瀾翻一曲竹枝詞  
雖然結襪王生僭人以此賢張釋之

簡季文

衰髯蕭騷半欲絲尚能隨隊作兒嬉  
慕無殺意從人活  
琴有仁聲却自悲  
落魄陳平歸漢日  
中傷張祿入秦時  
諸公莫作狂夫看  
恐是英雄未可知

陪趙丞飲東軒

冠蓋如雲許後陪  
酒紅醫老上吾腮  
轉旋舞影乾坤窄  
搖撼歌聲風雨來  
魚網撒池蓮葉老  
龍涎熏坐桂花開  
羣娥捧勸同文字  
商畧西風更百杯

龍洲集卷四

欽定四庫全書

龍洲集卷五

宋 劉過 撰

七言律

送張紫微

真仙元是昔于湖  
今在高樓何處居  
非玉不容陪偉論  
撥灰猶為作行書  
雲霞縹緲來旌節  
瓊玖玲瓏聞珮琚  
幽顯殊途人世隔  
冷風吹雨送回車

送劉教授

鳳閣鸞臺次第留此生何必為身謀工夫道易通三聖  
潔白持身第一流桑梓靜思如子少萍蓬自嘆此生浮  
還鄉若有過從便會盡人間只點頭

送王東鄉歸天台

枚數人才難倒指有如公者又東歸班行失士國輕重  
道路不言心是非載酒青山隨處飲談詩玉麈為誰揮  
歸期趕得東風早莫放梅花一片飛

其二

千岩萬壑天台路一日分為兩日程事可語人酬對易  
面無慚色去畱輕放開筆下閒風月收斂胸中舊甲兵  
世事看來忙不得百年到手是功名

送劉允叔還浙東

樹倒羣公尚不飛先生於此獨知機殺身無益事成敗  
閉口不言心是非吳渚蓴鱸張翰去鑑湖風月賀章歸  
從教血染長安市一舸清風眠釣磯

送友人遊南康

匏大從來速售難  
依人高戴誤儒冠  
江南久客諸侯去  
梅子愁人四月寒  
半世光陰旋蟻磨  
百年舉子上魚竿  
世間多少不平事  
盡向廬山靜處看

寄張都幹蒙正

林深葉密綠陰繁  
荷漸生芽蒲有根  
心事蹉跎過歲月  
故人落寞共乾坤  
舟行蓴菜水雲浦  
路入楊梅烟雨村  
何日扣門尋子去  
一樽聊對話黃昏

寄郭德順

王弟金昆共七人典刑惟有此公存一區未盡揚雄宅  
滿座常傾北海樽人品細看真第一詩篇遠寄不辭煩  
筍輿歸路無人管風雨瀟湘行暗村

寄郭伯瞻

聖門力學錢公輔盛世能書蔡伯喈出處有時安義命  
笑談無我見襟懷桂花香滿山堂開秋氣清連石洞偕  
只好放教椽筆健畱將大字寫磨崖

醉中寄王子林

我頭扶病醉岑岑履歷糟丘歲月深行李隨身惟一劍  
對花買笑亦千金離鄉別去天涯淚上塚淒其寒食心  
風雨閉門無過客爐香銷盡夜沈沈

寄呂英父

清時蕭散坐才疎收拾窮愁却著書詩筆有神通夢寐  
丰標不俗更清癯黃花細雨圖江路落日西風處士廬  
抖擻塵埃舊時帽不妨覓句倒騎驢

其二



秋到家山冷不知但驚風露入新詩  
低頭欲拜無東野  
滿耳惟聞說項斯  
骨格昂藏雲鶴瘦  
吟哦淒斷雪猿悲  
文章已得真消息  
三十科名已是遲

寄潘文叔

不隨千騎過維揚  
夜渡關山却一航  
臭味偶同貧更好  
功名有志老何傷  
自甘商皓求東閣  
敢怨陳登卧上床  
欲擊單于知力倦  
歸來且理舊詩囊

寄程鵬飛

往事遊邊憶少年未嘗携刺五侯門春風躍馬漢南道  
落日椎牛淮上村科舉未為暮年計窮途不忍向人言  
男兒慷慨頭當斷未有人施可報恩

襄陽雪中寄江西諸友

雨澁風慳夜向闌粉花飄撲客衣單功名有分平吳易  
貧賤無聞訪戴難懶逐銀盃行處馬靜思玉鑑舞時鸞  
詩成咫尺誰堪寄當與邦人醉底看

舟次富池寄九江諸公

既無文彩又顛狂五十餘年夢一場錯認我為林子晦  
也教人喚賀知章樽前鶴翅從誰舞老去槐花尚自忙  
船解酒醒人不見長江萬里水茫茫

南康邂逅江西吳運判

一節西來已駭傳不堪歸去便湘川舟行彭蠡輕文種  
酒到潯陽醉樂天臺諫久無公議論朝廷新有驟除遷  
臣心里竟終憂國不敢瞻烏涕泣然

其二

萬里西征一葉舟誰憐天地此生浮坐征秋浦雁飛處  
又泊江南霜葉洲貧困盡從歸後見雄豪半為病來休  
十年心事閒搔首荻雨蘆風總是愁

湖口邂逅張伯豐同行

萬里無人獨自行得君逆旅慰東征同連騎馬相先後  
共作詩詞迭唱賡僕向洞庭和雪渡船從湖口帶冰撐  
明年袍綠荊州去遇有西人好寄聲

西湖別舍弟潤之

幾度歸程入夢間  
秋鴻度燕兩為難  
西湖半夜風濤急  
交泗一床心胆寒  
落第我為中酒味  
園橋子亟洗儒酸  
臂弓秣馬長淮去  
莫笑狂夫老據鞍

張師古席上口占

海樹婆娑日出東  
一年窮處已殘冬  
春衫濕到西湖雨  
魂夢覺來長樂鐘  
梅擲白英樓壓鳳  
燈挑紅焰劍纏龍  
便教分閭持麾去  
未慊平時錦綉曾

姑蘇送王武岡不值訪汪仲冕席上口占

嚴城夜出鼓鼙畫鷁三更不見蹤何必披雲尋樂廣  
真成避雨識茅容  
薛花似雪玲瓏白臘酒如春琥珀濃  
若使世間無我輩老夫何處不窮冬

毛積夫席上口占

夜聽南窓金屈枝  
水花涼果似秋時  
人言愛酒陶元亮  
坐有能詩無本師  
顛倒六經鸚鵡舞  
瀾翻一曲鷓鴣詞  
同遊那得輕相笑  
恐是長庚未可知

放翁坐上

雲霧霏霏晚意涼野梔纔放已傳香幸哉世事日相遠  
怪底詩情老更狂臘蟻三杯浮重碧春膏一幅訥輕黃  
何人放浪形骸外盡乞江湖作醉鄉

次劉啟之韻

豪結交游三十年暮年識子海霜邊江西析派詩同社  
鴻寶傳家子已仙無用白鬚甘我老有才青眼望誰憐  
譬如飄泊湓城下篁竹蕭疎無管絃

次張昌化合溪新亭韻

不礙溪流水坐平主人平處主鷗盟兩峯呈秀出天造  
雙澗同流到地清尚憶經過曾對酒欲來登覽恨無名  
仙凡咫尺紅塵隔草草題詩亦浪評

其二

燕尾溪流上下分中餘里許地翻平林疎邑屋高低見  
水長舫船來往輕坡老已仙誰傑作詩人為縣得重評  
唐山見說雙溪館今見雙溪亭又成

次呂簿池亭韻



舉杯邀月到幽塘八月波心碎夜光倒影簾花翻翠色  
飛梭金段織紅芳是中有客供千首此外無塵染六郎  
昨夕主人閒立久一身風露帶天香

次史良夫寄題雲岫

輕烟薄霧任渠行幽壑深崖款我生變化不知天地濶  
行藏只要日星明肯同蒼狗移常態每為鳴鳩放好情  
便趁風雷助霧霽闕間是筇不須驚

長干寺用荆公韻

縈紆一徑試幽尋  
花竹禪房未是深  
野水不波清欲凍  
崇岡有竹翠成陰  
琵琶昵昵怨兒女  
蘭桂溫溫和水沈  
詩句欲追前輩後  
誰呼粉黛汗清吟

和都幹并東允道

老子聲名舊白眉  
客窓相款話心時  
相猶忘我吾無法  
骨已換仙君有詩  
蓴菜羹香冉冉鹿  
遊臺下草離離  
一樽吊古平章看  
未羨君王郡牧麾

和印監寺玉簪花

得得尋芳聽自由名花先占八分秋鷺鷥折股晚風冷  
姑射遺簪勝地幽霜葉皺痕羅扇薄香苞破處雪衣柔  
一瓶一鉢休岑寂騎鶴腰錢豈易謀

咏余商卿梔子花

香不求知色自然朝來何許雪華鮮如行佛國叅知識  
未嫁仙姿益淨娟梅子已黃猶夜雨客遊方倦作春眠  
地卑山近征衣潤不費熏爐一炷烟

與青原正庵老

倦行老矣徧東南最後青原識正庵無法更求身外說  
有禪應向意中叅春風遶寺雨花墜石鼎烹茶泉味甘  
暫免塵囂聊稅駕與君相對款清談

東能仁禮老

幻身到處等空虛習氣依然未掃除栢樹子邊尋祖意  
梅檀林下伴僧居三千世界初無礙十二時辰得自如  
牛糞火堆煨芋熟時時拾得懶殘餘

贈張道士

修廊行盡到山齋中有高人百念灰門外不知春出寺  
池邊惟見地生苔內丹久鍊龍長在大藥將成鶴屢來  
想見年年朝玉帝眉間一點淡黃開

贈張相士

青城遊遍蜀中山歸看功名飽已諳桀鰲稍能兒德祖  
興亡何闕百曹參諸公富貴紙上語滿座風雷終日談  
我是北人君記取偶然畱滞在東南

贈術士

一性圓明俱是佛四方落魄總成仙  
達人只可少說話賣術不須多覓錢  
退一步行安樂法道三箇好喜歡緣  
老夫亦欲挑包去若要相尋在酒邊

夜思中原

中原邈邈路何長文物衣冠天一方  
獨有孤臣流血淚更無奇傑叫天閭  
關河夜月冰霜重宮殿春風草木荒  
猶耿孤忠思報主揮天劍氣夜光芒

龍洲集卷五

欽定四庫全書

集部

龍洲集卷

六至十

詳校官庶吉士

臣翁樹培

主事

臣呂雲棟覆勘

總校官原任中允

臣王燕緒

校對官中書

臣汪學金

謄錄監生

臣鄧培善

欽定四庫全書

龍洲集卷六

宋 劉過 撰

七言律

題鳳凰臺

公子飄然有俊才  
此臺反覺在塵埃  
江淮浩渺洲渚沒  
鳳鳥寂寥鴻雁來  
時事不知惟拄笏  
書生無用且銜杯  
平生自厭胷中窄  
萬里霜天一日開

池州一覽亭



塵土中無絕妙詞不能重賦翠微詩淋漓醉墨楊廷秀  
慷慨悲吟杜牧之岩壑尚多吾足倦江山信美客歸遲  
夕陽鴉點城門閉堤上鞭垂萬柳絲

高遠亭

戍古城荒地勢雄一亭分半庾樓東廬山面目今真識  
江漢朝宗此會同司馬宅荒惟苦竹元規塵遠尚西風  
妖氛只隔淮河在誰為長驅一掃空

賞心亭

何人將我此來游白鷺那知客有愁如子矜持山玉立  
似子迂濶水盤洲塵襟抖擻風雲入石刻摩挲歲月流  
惆悵謫仙鸞馭遠離離別恨黯灘頭

龔山長棲閣

柳徑參差小蒨藍不知世有府潭潭揚雄宅就巢枝一  
去病家寒繞樹三從史諸公時爛漫勸酬終日酒醺酣  
出門萬里江邊去塵滿征衫我甚慚

南康天開圖畫樓

樓外烟波渺去鴻樓頭廬阜翠摩空故知造物鋪張巧  
不費丹青點染工赤壁江山橫夜月輞川庭館卧秋風  
祇今滿地無圖畫盡在西灣香靄中

建業酒樓落成預點燈

高樓百尺久推顏輪奐重新亦壯哉徹夜笙歌催臘盡  
聒天簫鼓挽春回都人雜沓揮千鎰我輩登臨夢一杯  
京國繁華欣再覩老來醉眼更堪開

洞霄宮

杖藜隨步到瓊宮，滿目幽奇景莫窮。  
山鎖九層雖極遠，洞連五處自相通。  
侵雲天柱籠朝霧，傍水清陰弄晚風。  
可惜春禽啼曉月，又催行李過江東。

同許從道登環翠閣

清潭石洞游俱徧，最後來尋此閣遨。  
樹木滿林成芘蔭，溪山圍縣恰週遭。  
結交有味貧何害，薄酒雖村飲亦豪。  
明日重陽吾未去，更於何處可登高。

同郭殿帥遊風山寺採桃李

廉纖小雨久於梅喜得晴新亦快哉  
五色波光麗鵲鵲  
十分雲氣繞蓬萊  
旌旗側畔宮牆轉  
戈戟叢中武庫回  
走馬看花生怕晚  
果然桃李一山開

雪晴遊惠山

松杉如立密當門  
長在山中管送迎  
鏤石草根留雪在  
響堦簷溜滴春聲  
簿書撥置君能到  
碑刻摩挲眼倍明  
欲作小詩無好句  
只題年月記經行

朱粲山

倦遊華髮老飄飄意氣依然在九霄努力尚能登岑巒  
廢詩那可寄參寥歌斜古寺雲為屋穩帖溪流石架橋  
安得柳間桃李動丹青吾欲畫生綃

登白雲絕頂

雨罷新晴怯宿寒一簾秋色滿闌干欲窮天地三千界  
頓上高峯八百盤累世避人大父母一時驚客漢衣冠  
塵寰元有清吟處便作三山蓬島看

登清凉臺寺

江南江北許多山到處登臨得凭欄老木漸丹霜有信  
怒濤衝岸水生寒倦遊半世烏三匝往事千年指一彈  
落日正西催上馬依依回首問長安

又借韻山行

杖屨尋詩問所由一天草木葉知秋天低雲淡村村好  
雨過山深物物幽斑駁岩頭苔蘚濕鉤輶樹尾鳥聲柔  
眼前不見市朝事始笑從前利祿謀

大麓道中

竹輿啞軋曉烟收蒼玉巉岩萬里秋路轉羊腸回草徑  
溪分燕尾遶沙洲愛山有癖須還債覓句無功自不休  
晴得幾時遊便好桂花蓓蕾作針頭

登凌雲高處

攝衣更上一層樓纔到層霄最上頭方識乾坤真轉轂  
好知身世付虛舟九秋草木嵐烟濕萬里山川海氣浮  
更欲杖藜窮望眼眼中何處認神州

過泰和宮



林塘漠漠亂花飛  
門掩蒼苔過客稀  
蝴蝶與身俱是夢  
杜鵑憐我幾時歸  
徐行便當籃輿穩  
清話何妨羽扇揮  
四十九年蘧伯玉  
此生畢竟是邪非

過西興

奔濤洶湧欲騎鯨  
船去錢塘棹不停  
何日子胥鞭楚墓  
傷時周顓泣新亭  
蚊虻過耳蠻音惡  
蝦蟇薰人海氣腥  
吳下阿蒙非昔日  
眼高相對有誰青

遊北墅

客裡浮沈又一年春風北豎故依然路邊花有香相引  
澗下松無色可憐仙鶴舞隨人擊筑神鴉飛傍客歸船  
何須故掃霜前葉却趁東風學曉烟

呂氏山堂喜雨

涼滿蒲萄磊落枝倦遊來此亦忘歸溝渠水活龍蛇動  
樹木月明烏鵲飛欣減黃梁新米價愁生白苧舊征衣  
風流却扇團圞坐一夜談兵玉麈揮

雨作妨登山

莫笑林宗折角巾  
雨師堅壁助秋城  
菰蒲送冷橫烟淡  
鷗鷺驚秋立水輕  
山勢欲窮猶有路  
溪流似斷又聞聲  
好懷聊擬攜筇去  
正值農夫荷笠畊

其二

暑風快處岸烏巾  
去去扁舟遠帝城  
過眼溪山含霧重  
多情草木逗烟輕  
琴書正要疎人事  
禽鳥足然聽履聲  
莫恨漏天霖雨惡  
難恣好好筆為畊

其三

杖履飄然不整巾  
緣何問得梵王城  
淡烟翠濕千螺皴  
微日烟消一紙輕  
隔山鳥語如人語  
觸處風聲若水聲  
見說一犁今已足  
笑歌蓬首餉夫畊

掛搭松窩

十年南北走東西  
豪氣崢嶸老不衰  
快斬妖魔三尺劍  
朗吟風月五言詩  
山無福地吾焉托  
神有靈丹世不知  
却恐松窩知此意  
一絲掛搭去何疑

鹽官權學

人生百歲等歡悲已判行藏任所之筆硯重尋驚夢覺  
課程聊復伴兒嬉荒涼傍海多閒趣閉戶觀書有倦歌  
破帽塵埃今已矣不妨更借蹇驢騎

鹽官借沈氏屋

借宅西頭對短檠一燈相對紙窓橫煨爐火活蹲鴟熟  
沸鼎茶香蚯蚓鳴萬卷讀書空老大諸生蓋世盡功名  
依稀草木還鄉去便向夜深聞雨聲

入徽州

遙望烟霞色正鮮夢中忽已過前川紅塵冉冉行天上  
黃道駸駸近日邊石洞歛溪俱可硯山肥嶽路總堪田  
採菊便欲僑居去奈此功名未了緣

寓公坊

秋風漸漸正吹涼似報歸期未欲忙尋路竹間深入寺  
泊船沙外遠依庄小槽壓酒硃紅滴新飯炊粳雪白香  
更聽夜來思遠浦軍聲十萬似錢塘

六合道中

十年曾記此來游有策中原一戰收蒲柳易凋嫌勢去  
金湯無用卒歸休悲風髣髴鳴刁斗缺月參差點敵樓  
廟食封侯何日事不堪老馬又滁州

醉中偶成

小院蒲萄月架東舞腰忙趁鼓聲雄詩成綠筆分題後  
人在金釵賭令中秋葉冷吟風浩蕩晚林烘透日玲瓏  
腰間若佩滁州印定有人呼作醉翁

無錫道觀

門外紅塵市一塵買瓜買李興悠然樹根石透月洒落  
殿閣屋多風折旋賣墨道人勤置酒能詩老子欲飛仙  
髑髏南面蛆蟲輩鵬鷃逍遙各自天

招義銘育王見佛照

豪傑書生懶散仙小菴藏跡得安閒禪曾勘破諸公去  
詩在推敲一字間夜雨滴殘梧葉老夕陽行處水花慳  
買舟便欲乘風去孤絕同游海島山

金陵雪中



風幻寒威夜撲人  
曉看雲脚四垂陰  
牧羝塞上功名淚  
騎馬藍關竄逐心  
冷面不春愁苑結  
凍鬚如鐵恐蕭森  
畫爐醉撥灰為字  
不為閒思煖帳金

對雪

匣中雷吼一長劍  
溪上月明多少舟  
無賊可平閒李愬  
有人不訪倦王猷  
銀杯縞帶從渠便  
瑤樹瓊林得自由  
衣敝獨嫌灰絮料  
簾高想見月垂鉤

觀白鷺洲風濤

一聲雷鼓快風威  
頃刻衝濤沒釣磯  
行客駭看銀漢落  
陽侯驚起玉山飛  
蛟龍使爾爭先化  
鷗鷺茫然失所依  
安得長竿入吾手  
翩然東海釣鰲歸

偕陳調翁龍山買舟待潮夜發

來逢春雨長田苗  
去見秋風劈蟹螯  
久矣歸心到鄉國  
依然水宿伴漁舠  
一天如許皆明月  
二客所須惟濁醪  
今夜四更潮有信  
更須畱眼看銀濤

發舟

寶氣亭前首問途清飈日日送蘧篨丹楓無處不愁客  
白鷺有情如導吾青竹間垂任子釣紫鱗時掣季鷹魚  
烟波渺渺江天晚水宿又聽溪鳥呼

舟中偶作

日日拖舟上碧溪寒灘水淺草離離尺書雁斷歲行盡  
五兩風輕帆去遲白鷺導吾如有意丹楓愁客亦何為  
關頭安起梅花約更著寬程五日期

舟中

下水南風不覺難我舟不動穩如山東西日月尋常事  
變化雲烟頃刻間沙鳥似驚皆退避林巒如畫亦渾閒  
歸期只欲長安近屈指何時到北關

霜寒舟中

展轉牛衣冷不禁著人無奈曉寒侵由來十月清霜重  
況乃荒村白露深有客分金來橘社何人塗血染楓林  
不堪青女來料理折盡衰翁一片心

春日即事

金匱要略卷六  
久客無人問所須小窓翻得逐癡愚黃昏以後酒三盞  
白日之間飯兩盂穀雨筭茶俱俊美條風杞菊競甘腴  
先賢且謂可行樂況是平生山澤癯

其二

出門雖是欠陶朱便使闔門亦可居物價偏廉常食肉  
傭賃極省易鈔書已安櫟社如無用若此叢林似有餘  
歸興未歸天上事只消如此看何如

幽居

對面滄浪可濯纓不思泛艇出春城浮沈粉社何人重  
俯仰茆簷是事輕玉葢連屏寒徙倚蒲萄上架月縱橫  
江湖老矣無他願只欲清陰便得成

自述

扁舟送客出姑蘇晚泊吳江夜雨餘波浪稍平風力定  
青黃相間橘林疎匆忙旅館催行酒草率杯盤旋買魚  
與我壁間書歲月無人為上小行書

其二

精神凋耗鬢毛衰  
劫火光中穿幾回  
無可奈何教老去  
有時猛省忽愁來  
師崇道學原非偽  
客寄蘇州却類猷  
明日重陽又佳節  
得錢且醉菊花杯

自慚

一榻畱人去便垂  
自慚非友亦非師  
初無伎倆惟貪酒  
遇有工夫或賦詩  
晒日棗林紅磊落  
響風桐葉碧參差  
人家正使鱸魚膾  
老子秋來却自悲

下第

蕩蕩天門叫不應起尋歸路向南行  
新亭未必非周顗  
宣室終須召賈生  
振海潮聲風洶湧  
揀天劍氣夜崢嶸  
傷心故國三千里  
纔是餘杭第一程

歲晚

手種疎梅已發妍  
相從三過客中年  
吾生豈得頻如意  
隨處何妨且信緣  
風月情多時小醉  
軒裳夢少日安眠  
萬人海裡能如此  
自是枯禪并散仙



龍洲集卷六